

কাজী নজরুল ইসলাম

আগ্নি-বীণা



অগ্নি-বীণা

উৎসর্গ

ভাঙা বাংলার রাঙা যুগের আদি পুরোহিত, সাগ্নিক বীর

• শ্রীবীরাজকুমার ঘোষ

শ্রীশ্রীচরণারবিন্দেষু

অগ্নি-ঋষি ! অগ্নি-বীণা তোমায় শুধু সাজে ।

তাই তো তোমার বহি-রাগেও বেদন-বেহাগ বাজে ॥

দহন-বনের গহন-চারী—

হায় ঋষি—কোন বংশীধারী

নিঙড়ে আগুন আনলে বারি

অগ্নি-মরুর মাঝে ।

সর্বনাশা কোন বাঁশি সে বুঝতে পারি না যে ॥

দুর্বাসা হে ! রুদ্র তড়িৎ হান্ছিলে বৈশাখে,

হঠাৎ সে কার শুনলে বেণু কদম্বের ঐ শাখে ।

বজ্রে তোমার বাজল বাঁশি,

বহি হলো কাম্মা হাসি,

সূরের ব্যাখ্যায় প্রাণ উদাসী—

মন সরে না কাজে ।

তোমার নয়ন-স্বরা অগ্নি-সুরেও রক্ত-শিখা বাজে ॥

মুখবন্ধ

অগ্নি-বীণা-র প্রচ্ছদপটের পরিকল্পনাটি চিত্রকর-সম্রাট শ্রীযুত অবনীন্দ্রনাথ ঠাকুরের, এবং ঐক্যেছেন তরুণ চিত্রশিল্পী শ্রীবীরেশ্বর সেন। এজন্য প্রথমেই তাঁদের ধন্যবাদ ও কৃতজ্ঞতা নিবেদন করছি।

‘ধূমকেতুর পুচ্ছে জড়িয়ে পড়ার দরুন যেমনটি চেয়েছিলাম তেমনটি করে অগ্নি-বীণা বের করতে পারলাম না। অনেক ভুলত্রুটি ও অসম্পূর্ণতা রয়ে গেল। সর্বপ্রথম অসম্পূর্ণতা, যেসব গান ও কবিতা দেবো বলে বিজ্ঞাপন দিয়েছিলাম, সেইগুলি দিতে পারলাম না। কেননা সে সমস্তগুলি দিতে গেলে বইটি খুব বড় হয়ে যায়, তার পর ছাপানো ইত্যাদি খরচ এত বেশি পড়ে যায় যে এক টাকায় বই দেওয়া সম্পূর্ণ অসম্ভব হয়ে পড়ে। পূর্বে যখন বিজ্ঞাপন দিয়েছিলাম, তখন ভাবিনি, যে, সমস্ত কবিতা গান ছাপতে গেলে, তা এত বড় হয়ে যাবে, কেননা আমার প্রত্যক্ষ-জ্ঞান কোনো দিনই ছিল না, আজও নেই। এর জন্য যতটুকু গালি-গালাজ বদনাম সব আমাকে অকুতোভয়ে হজম করতে হবেই। তবু আমার পাঠক পাঠিকার নিকট আমার এই ত্রুটি বা অপরাধের জন্য ক্ষমা চাচ্ছি। বাকি কবিতা ও গানগুলি দিয়ে এবং পরে কতকগুলি কবিতার সমষ্টি নিয়ে এইরকম আকারেরই অগ্নি-বীণা-র দ্বিতীয় খণ্ড দিন পনের মধ্যেই বেরিয়ে যাবে। আর্য পাবলিশিং হাউজ-এর ম্যানেজার আমার অগ্রজপ্রতিম শ্রীযুক্ত শরৎচন্দ্র গুহের ঐকান্তিক চেষ্টারই সাহায্যে আমি অগ্নি-বীণা কোনোরকমে শেষ করতে পারলাম; আরো অনেকে অনেকরকম সাহায্য ও উৎসাহ দিয়েছেন। তাঁদের সকলকে আমার শ্রদ্ধা, কৃতজ্ঞতা জানাচ্ছি।

বিনীত

কাজী নজরুল ইসলাম

প্রলয়োল্লাস

তোরা সব জয়ধ্বনি কর্ !
তোরা সব জয়ধ্বনি কর্ ! !
ঐ নূতনের কেতন ওড়ে কাল-বোশেখির ঝড়।
তোরা সব জয়ধ্বনি কর্ !
তোরা সব জয়ধ্বনি কর্ ! !

আসছে এবার অনাগত প্রলয়-নেশার নৃত্য-পাগল,
সিন্ধু-পারের সিংহ-দ্বারে ধমক হেনে ভাঙল আগল।
মৃত্যু-গহন অঙ্ক-কূপে
মহাকালের চণ্ড-রূপে—
ধূম্র-ধূপে
বজ্র-শিখার মশাল জ্বলে আসছে ভয়ঙ্কর—
ওরে ঐ হাসছে ভয়ঙ্কর !
তোরা সব জয়ধ্বনি কর্ !
তোরা সব জয়ধ্বনি কর্ ! !

ঝামর তাহার কেশের দোলায় ঝাপটা মেরে গগন দুলায়,
সর্বনাশী জ্বালা-মুখী ধূমকেতু তার চামর ঢুলায় !
বিশ্বপাতার বক্ষ-কোলে
রক্ত তাহার কৃপাণ ঝোলে
দোদুল্ দোলে !
অট্টরোলের হট্টগোলে স্তব্ধ চরাচর—
ওরে ঐ স্তব্ধ চরাচর !
তোরা সব জয়ধ্বনি কর্ !
তোরা সব জয়ধ্বনি কর্ ! !

দ্বাদশ রবির বহ্নি-জ্বালা ভয়াল তাহার নয়ন-কটায়,
দিগন্তরের কাঁদন লুটায় পিঙ্গল তার ব্রহ্ম জটায় !

বিন্দু তাহার নয়ন-জলে
 সপ্ত মহাসিন্ধু দোলে
 কপোল-তলে !
 বিশ্ব-মায়েব আসন তারি বিপুল বাহুর স্পর—
 হাঁকে ঐ 'জয় প্রলয়ঙ্কর !'
 তোরা সব জয়ধ্বনি কর !
 তোরা সব জয়ধ্বনি কর ! !

মাইভে মাইভে ! জগৎ জুড়ে প্রলয় এবার ঘনিষে আসে !
 জরায়-মরা মুমূর্ষুদের প্রাণ লুকানো ঐ বিনাশে !
 এবার মহা-নিশার শেষে
 আসবে উষা অরুণ হেসে
 করুণ বেশে !
 দিগম্বরের জটায় লুটায় শিশু চাঁদের কর,
 আলো তার ভরবে এবার ঘর ।
 তোরা সব জয়ধ্বনি কর !
 তোরা সব জয়ধ্বনি কর ! !

ঐ নে মহাবল-সারথি রক্ত-তড়িত-চাবুক হানে,
 রণিয়ে ওঠে হুয়ার কাঁদন বজ্র-গানে ঝড়-তুফানে !
 খুরের দাপট তারায় লেগে উজ্জ্বল ছুটায় নীল খিলানে !
 গগন-তলের নীল খিলানে ।

অন্ধ কারার বঙ্ক কূপে
 দেবতা বাঁধা যজ্ঞ-যুগে
 পায়ণ স্তূপে !

এই তো রে তার আসার সময় ঐ রথ-ঘর্ঘর—
 শোনা যায় ঐ রথ-ঘর্ঘর ।
 তোরা সব জয়ধ্বনি কর !
 তোরা সব জয়ধ্বনি কর ! !

ধ্বংস দেখে ভয় কেন তোর ?—প্রলয় নূতন সৃজন-বেদন !
 আসছে নবীন-জীবন-হারা অ-সুন্দরে করতে ছেদন !
 তাই সে এমন কেশে বেশে
 প্রলয় বয়েও আসছে হেসে—
 মধুর হেসে !

অগ্নি-বীণা

ভেঙে আবার গড়তে জানে সে চির-সুন্দর !

তোরা সব জয়ধ্বনি কর !

তোরা সব জয়ধ্বনি কর !!

ঐ ভাঙা-গড়া খেলা যে তার কিসের তবে ডর ?

তোরা সব জয়ধ্বনি কর !—

বধূরা প্রদীপ তুলে ধর !

কাল ভয়ঙ্করের বেশে এবার ঐ আসে সুন্দর !—

তোরা সব জয়ধ্বনি কর !

তোরা সব জয়ধ্বনি কর !!

বিদ্রোহী

বল বীর—

বল উন্নত মম শির !

শির নেহারি আমারি, নত-শির ওই শিখর হিমাদ্রির !

বল বীর—

বল মহাবিশ্বের মহাকাশ ফাড়ি

চন্দ্র সূর্য গ্রহ তারা ছাড়ি

ভূলোক দুলোক গোলোক ভেদিয়া,

খোদার আসন ‘আরশ’ ছেদিয়া

উঠিয়াছি চির-বিস্ময় আমি বিশ্ব-বিধাত্রীর !

মম ললাটে রুদ্র ভগবান জ্বলে রাজ-রাজটাকা দীপ্ত জয়শ্রীর !

বল বীর—

আমি চির-উন্নত শির !

আমি চিরদুর্দম, দুবিনীত, নৃশংস,

মহা-প্রলয়ের আমি নটরাজ, আমি সাইক্লোন, আমি ধ্বংস

আমি মহাভয়, আমি অভিশাপ পৃথ্বীর !

আমি দুর্বীর,

আমি ভেঙে করি সব চুরমার !
 আমি অনিয়ম উচ্ছৃঙ্খল
 আমি দলে যাই যত বন্ধন, যত নিয়ম কানুন শৃঙ্খল !
 আমি মানি নাকো কোনো আইন,
 আমি ভরা-তরী করি ভরা-ডুবি, আমি টপেঁডো, আমি ভীম ভাসমান মাইন !
 আমি ধুজ্জটি, আমি এলোকেশ বাড় অকাল-বৈশাখীর !
 আমি বিদ্রোহী আমি বিদ্রোহী-সুত বিশ্ব-বিধাতার !
 বল বীর—
 চির উন্নত মম শির !

আমি বন্ধ্যা, আমি ঘূর্ণি,
 আমি পথ-সম্মুখে যাহা পাই যাই চূর্ণি।
 আমি নৃত্য-পাগল ছন্দ,
 আমি আপনার তালে নেচে যাই, আমি মুক্ত জীবনানন্দ !
 আমি হাম্বীর, আমি ছায়ানট, আমি হিন্দোল,
 আমি চল চঞ্চল, ঠমকি ছমকি
 পথে যেতে যেতে চকিতে চমকি
 ফিং দিয়া দিই তিন দোল !
 আমি চপলা-চপল হিন্দোল !

আমি তাই করি ভাই যখন চাহে এ মন যা,
 করি শত্রুর সাথে গলাগলি, ধরি মৃত্যুর সাথে পঞ্জা,
 আমি উম্মাদ আমি বন্ধ্যা !
 আমি মহামারী, আমি ভীতি এ ধরিত্রীর।
 আমি শাসন-তাসন, সংহার আমি উষ্ণ চির-অধীর।
 বল বীর—
 আমি চির-উন্নত শির।

আমি চির-দুরন্ত দুর্মদ,
 আমি দুর্দম, মম প্রাণের পেয়ালা হর্দম হ্যায় হর্দম ভবপূর মদ।
 আমি হোম-শিখা, আমি সাগ্নিক জ্বলদগ্নি,
 আমি যজ্ঞ, আমি পুরোহিত, আমি অগ্নি !

অগ্নি-বীণা

আমি সৃষ্টি, আমি ধ্বংস, আমি লোকালয়, আমি শ্মশান,
আমি অবসান, নিশাবসান !
আমি ইন্দ্রাণি-সুত হাতে-চাঁদ ভালে সূর্য,
মম এক হাতে বাঁকা বাঁশের বাঁশরি, আর হাতে রণ-তুর্য !
আমি কৃষ্ণ-কণ্ঠ, মন্থন-বিষ পিয়া ব্যথা-বারিধির !
আমি ব্যোমকেশ, ধরি বন্ধন-হারা ধারা গঙ্গোত্রীর ।
বল বীর—
চির— উন্নত মম শির !

আমি বেদুঈন, আমি চেঙ্গিস,
আমি আপনারে ছাড়া করি না কাহারে কুর্নিশ ।
আমি বজ্র, আমি ঈশান-বিষাণে ওঙ্কার,
আমি ইন্দ্রাফিলের শিকার মহা-হুঙ্কার,
আমি পিনাক-পাণির ডমরু ত্রিশূল, ধর্মরাজের দণ্ড,
আমি চক্র ও মহাশঙ্খ, আমি প্রণব-নাদ প্রচণ্ড !
আমি খ্যাপা দুর্বাসা-বিশ্বামিত্র-শিষ্য,
আমি দাবানল-দাহ, দাহন করিব বিশ্ব !
আমি প্রাণ-খোলা হাসি উল্লাস,—আমি সৃষ্টি-বৈরী মহাত্রাস,
আমি মহা-প্রলয়ের দ্বাদশ রবির রাহু-গ্রাস !
আমি কভু প্রশান্ত,—কভু অশান্ত দারুণ স্বেচ্ছাচারী,
আমি অরুণ খুনের তরুণ, আমি বিধির দর্প-হারী !
আমি প্রভঞ্নের উচ্ছাস, আমি বারিধির মহাকল্লোল,
আমি উজ্জ্বল, আমি প্রোজ্জ্বল,
আমি উচ্ছল জল-ছল-ছল, চল-উর্মির হিন্দোল-দোল !—

আমি বন্ধন-হারা কুমারীর বেণী, তন্ত্রী-নয়নে বহ্নি,
আমি ষোড়শীর হৃদি-সরসিঙ্গ প্রেমউদ্দাম, আমি ধনি ।
আমি উন্মন মন উদাসীর,
আমি বিধবার বুকে ত্রন্দন-শ্বাস, হা-হতাশ আমি হতাশির !
আমি বঞ্চিত ব্যথা পথবাসী চির-গৃহহারা যত পথিকের,
আমি অবমানিতের মরম-বেদনা, বিষ-জ্বালা, প্রিয়-লাঞ্ছিত বুক গতি ফের !
আমি অভিমানী চির-ক্ষুব্ধ হিয়ার কাতরতা, ব্যথা সুনিবিড়,
চিত-চুম্বন-চোর-কম্পন আমি ধর-ধর-ধর প্রথম পরশ কুমারীর !
আমি গোপন-প্রিয়ার চকিত চাহনি, ছল-করে-দেখা-অনুখন,
আমি চপল মেয়ের ভালোবাসা, তার কাঁকন চুড়ির কন-কন ।

আমি চির-শিশু, চির-কিশোর,
 আমি যৌবন-ভিত্তি পল্লীবালায় অঁচর কাঁচলি নিচোর !
 আমি উত্তরী-বায়ু, মলয়-অনিল, উদাস পূরবী হাওয়া,
 আমি পথিক-কবির গভীর রাগিণী, বেণু-বীণে গান গাওয়া ।
 আমি আকুল নিদাঘ-তিয়াষা, আমি রৌদ্র-রুদ্ধ রবি,
 আমি মরু-নির্বর ঝর-ঝর, আমি শ্যামলিমা ছায়া-ছবি ।—
 আমি তুরীয়ানন্দে ছুটে চলি এ কি উন্মাদ, আমি উন্মাদ !
 আমি সহসা আমারে চিনেছি, আমার খুলিয়া গিয়াছে সব বাঁধ !

আমি উত্থান, আমি পতন, আমি অচেতন-চিত্তে চেতন,
 আমি বিশ্ব-তোরণে বৈজয়ন্তী, মানব-বিজয়-কেতন ।
 ছুটি ঝড়ের মতন করতালি দিয়া
 স্বর্গ-মর্ত-করতলে,
 তাজি বোরবাক্ আর উচ্চৈশ্রবা বাহন আমার
 হিম্মৎ-হেমা হৈকে চলে !
 আমি বসুধা-বক্ষে আগ্নেয়াদি, বাড়ব-বহি, কালানল,
 আমি পাতালে মাতাল অগ্নি-পাথর-কলরোল-কল-কোলাহল !
 আমি তড়িতে চড়িয়া উড়ে চলি জোর তুড়ি দিয়া, দিয়া লক্ষ্য,
 আমি ত্রাস সঞ্চারি ভুবনে সহসা সঞ্চারি ভূমি-কম্প !
 ধরি বাসুকির ফণা জাপটি,
 ধরি স্বর্গীয় দূত জিব্রাইলের আগুনের পাখা সাপটি !
 আমি দেব-শিশু, আমি চঞ্চল,
 আমি ধৃষ্ট, আমি দাঁত দিয়া ছিড়ি বিশ্ব-মায়ের অঞ্চল !

আমি অফিসাসের বাঁশরি,
 মহা-সিন্ধু উতলা ঘুম-ঘুম
 ঘুম চুমু দিয়ে করে নিখিল বিশ্বে নিবন্ধুম
 মম বাঁশরির তানে পাশরি !
 আমি শ্যামের হাতের বাঁশরি ।

—আমি রুষে উঠে যবে ছুটি মহাকাশ ছাপিয়া,
 ভয়ে সপ্ত নরক হাবিয়া দোজখ নিভে নিভে যায় কাঁপিয়া !
 আমি বিদ্রোহ-বাহী নিখিল অখিল ব্যাপিয়া ।
 আমি শ্রাবণ-প্লাবন-বন্যা,
 কভু ধরণীয়ে করি বরণীয়া, কভু বিপুল ধ্বংস-ধন্যা—
 আমি ছিনিয়া আনিব বিষ্ণু-বক্ষ হইতে যুগল কন্যা !
 আমি অন্যায়, আমি উষ্ণা, আমি শনি,
 আমি ধুমকেতু-ছালা, বিষধর কাল-ফণি !
 আমি ছিন্নমস্তা চণ্ডি, আমি রণদা সর্বনাশী,
 আমি জাহান্নামের আগুনে বসিয়া হাসি পুষ্পের হাসি !

আমি মৃন্ময়, আমি চিন্ময়,
 আমি অজর অমর অক্ষয়, আমি অব্যয় !
 আমি মানব দানব দেবতার ভয়,
 বিশ্বের আমি চির-দুর্জয়,
 জগদীশ্বর-ঈশ্বর আমি পুরুষোত্তম সত্য,
 আমি তাথিয়া তাথিয়া মথিয়া ফিরি এ স্বর্গ পাতাল মর্ত !
 আমি উন্মাদ আমি উন্মাদ ! !
 আমি চিনেছি আমারে, আজিকে আমার খুলিয়া গিয়াছে সব বাঁধ ! !—

আমি পরশুরামের কঠোর কুঠার,
 নিঃশঙ্কত্রিয় করিব বিশ্ব, আনিব শান্তি শান্ত উদার !
 আমি হল বলরাম-স্কন্ধে,
 আমি উপাড়ি ফেলিব অধীন বিশ্ব অবহেলে নব-সৃষ্টির মহানন্দে ।
 মহা- বিদ্রোহী রণ-ক্লান্ত
 আমি সেই দিন হব শান্ত,
 যবে উৎপীড়িতের ব্রন্দন-রোল আকাশে বাতাসে ধনিবে না,
 অত্যাচারীর খড়গ কৃপাণ ভীম রণ-ভূমে রণিবে না—
 বিদ্রোহী রণ-ক্লান্ত
 আমি সেই দিন হব শান্ত !

আমি বিদ্রোহী ভৃগু, ভগবান বুকে ঐকে দিই পদ-চিহ্ন,
আমি স্রষ্টা-সৃজন, শোক-তাপ-হানা খেয়ালি বিধির বন্ধ করিব ভিন্ন !
আমি বিদ্রোহী ভৃগু, ভগবান-বুকে ঐকে দেবো পদ-চিহ্ন !
আমি খেয়ালি বিধির বন্ধ করিব ভিন্ন !

আমি চির-বিদ্রোহী বীর—
আমি বিশ্ব ছাড়ায়ে উঠিয়াছি একা চির-উন্নত শির !

রক্তাম্বরধারিনী মা

রক্তাম্বর পর মা এবার
জ্বলে পুড়ে যাক শ্বেত বসন ।
দেখি ঐ করে সাজে মা কেমন
বাজে তরবারি ঝনন-ঝন্ ।
সিঁথির সিঁদুর মুছে ফেল মা গো
জ্বাল সেথা জ্বাল কাল-চিতা ।
তোমার খড়গ-রক্ত হউক
স্রষ্টার বুকে লাল ফিতা ।
এলোকেশে তব দুলুক ঝনঝা
কাল-বৈশাখী ভীম তুফান,
চরণ-আঘাতে উদ্গারে যেন
আহত বিশ্ব রক্ত-বান ।
নিশ্বাসে তব পৈঞ্জা-তুলো সম
উড়ে যাক মা গো এই ভুবন,
অ-সুরে নাশিতে হউক বিষ্ম
চক্র মা তোর হেম-কাঁকন ।
টুটি টিপে মারো অত্যাচারে মা,
গল-হার হোক নীল ফাঁসি,

নয়নে তোমার ধূমকেতু-জ্বালা
 উঠুক সরোষে উদ্ভাসি।
 হাসো খলখল, দাও করতালি,
 বলো হর হর শঙ্কর !
 আজ হতে মা গো অসহায় সম
 ক্ষীণ ত্রন্দন সম্ভব।
 মেখলা ছিড়িয়া চাবুক করো মা,
 সে চাবুক করো নভ-তড়িৎ,
 জ্বালিমের বুক বেয়ে খুন ঝরে
 লালে-লাল হোক শ্বেত হরিৎ।
 নিদ্রিত শিবে লাথি মারো আজ,
 ভাঙো মা ভোলার ভাঙ-নেশা,
 পিয়াও এবার অ-শিব গরল
 নীলের সঙ্গে লাল মেখা।
 দেখা মা আবার দনুজ-দলনী
 অশিব-নাশিনী চণ্ডি রূপ ;
 দেখাও মা ঐ কল্যাণ-করই
 আনিতে পারে কি বিনাশ-স্তূপ।
 শ্বেত শতদল-বাসিনী নয় আজ
 রক্তাম্বরধারিণী মা,
 ধ্বংসের বুক হাসুক মা তোর
 সৃষ্টির নব পূর্ণিমা।

আগমনী

একি রণ-বাজ্রা বাজে ঘন ঘন—
 ঝন রনরন রন ঝনঝন !
 সেকি দমকি দমকি

ধমকি ধমকি
 দামা-দ্রিমি-দ্রিমি গমকি গমকি
 ওঠে চোটে চোটে,
 ছোটে লোটে ফোটে !
 বহি-ফিনিকি চমকি চমকি
 ঢাল-তলোয়ারে খনখন !
 একি রণ-বাজা বাজে ঘন ঘন
 রণ বনবন বন রণরণ !

হৈ হৈ রব
 ঐ ভৈরব
 হাঁকে, লাখে লাখে
 ঝাঁকে ঝাঁকে
 লাল গৈরিক-গায় সৈনিক ধায় তালে তালে
 ওই পালে পালে,
 ধরা কাঁপে দাপে ।
 জাঁকে মহাকাল কাঁপে ধরধর !
 রণে কড়কড় কাড়া-ঝাঁড়া-ঘাত,
 শির পিষে হাঁকে রথ-ঘর্ঘর-ধ্বনি ঘরঘর !
 'গুরু' গরগর' বোলে ভেরী তুরী,
 'হর' হর হর'
 করি চীৎকার ছোটে সুরাসুর-সেনা হনহন !
 ওঠে বনঝা ঝাপটি দাপটি সাপটি
 হু-হু-হু-হু-হু শনশন !
 ছোটে সুরাসুর-সেনা হনহন !

তাতা থৈথে তাতা থৈথে খল খল খল
 নাচে রণ-রঞ্জিনী সঙ্গিনী সাথে,
 ধকধক জ্বলে জ্বলজ্বল
 বুকে মুখে চোখে রোষ-হুতাশন !
 রোস্ কোথা শোন !

ঐ ডম্বরু-ঢোলে ডিমিডিমি বোলে,
 ব্যোম মকৎ স-অম্বর দোলে,

মম-বরুণ কী কল-কল্লোলে চলে উতরোলে
ধ্বংসে মাতিয়া তাখিয়া তাখিয়া
নাচিয়া রঞ্জে ! চরণ-ভঞ্জে
সৃষ্টি সে টলে টলমল ! ,

ওকি বিজয়-ধ্বনি সিঙ্খু গরজে কলকল কল কলকল !
ওঠে কোলাহল,
কূট হলাহল
ছোটো মস্থনে পুন রক্ত-উদধি,
ফেনা-বিশ ক্ষরে গলগল !
টলে নির্বিকার সে বিধাতীরো গো
সিংহ-আসন টলমল !
কার আকাশ-ছোড়া ও আনত-নয়ানে
করুণা-অশ্রু ছলছল !

বাজে মৃত সুবাসুর-পাঁজরে বাঁজর বম্ববম্,
নাচে ধূজটি সাথে প্রমথ ববম্ বম্ববম্ !
লাল লালে-লাল ওড়ে ঈশানে নিশান যুদ্ধের,
ওঠে ওঙ্কার রণ-ডঙ্কার,
নাদে ওম্ ওম্ মহাশঙ্খ বিষাণ রুদ্রের !
ছোটো রক্ত-ফোয়ারা বহির বান রে !
কোটি বীর-প্রাণ
ক্ষণে নির্বাণ

তবু শত সূর্যের জ্বালাময় রোষ
গমকে শিরায় গম্গম্ !
ভয়ে রক্ত-পাগল প্রেত পিশাচেরও
শিরদাঁড়া করে চন্‌চন্ !
যত ডাকিনী যোগিনী বিস্ময়াহতা,
নিশীথিনী ভয়ে থম্‌থম্ !
বাজে মৃত সুবাসুর-পাঁজরে বাঁঝর বম্ববম্ !

ঐ অসুর-পশুর মিথ্যা দৈত্য-সেনা যত
হত আহত করে রে দেবতা সত্য !
স্বর্গ, মর্ত, পাতাল, মাতাল রক্ত-সুরায় ;

ত্রস্ত বিধাতা,
মস্ত পাগল পিনাক-পাণি স-ত্রিশূল প্রলয়-হস্ত ঘুরায় !
ক্ষিপ্ত সবাই রক্ত-সুরায় !

চিতার উপরে চিতা সারি সারি,
চারিপাশে তারি
ডাকে কুঙ্কুর গৃধিনী শৃগাল !
প্রলয়-দোলায় দুলিছে ত্রিকাল !
প্রলয়-দোলায় দুলিছে ত্রিকাল ! !

আজ রণ-রঙ্গিনী জগৎমাতার দেখ মহারণ,
দশদিকে তাঁর দশ হাতে বাজে দশ প্রহরণ !
পদতলে লুটে মহিষাসুর,
মহামাতা ঐ সিংহ-বাহিনী জানায় আজিকে বিশ্ববাসীকে—
শাস্বত নহে দানব-শক্তি, পায়ে পিষে যায় শির পশুর !

‘নাই দানব
নাই অসুর,—
চাইনে সুৰ,
চাই মানব !’—
বরাভয়-বাণী ঐ রে কার
শুনি, নহে হৈ রে এবার !

ওঠ রে ওঠ,
ছোট্ট রে ছোট্ট !
শাস্ত মন,
ক্ষান্ত রণ !—

খোল্ তোরণ,
চল্ বরণ
করব মায় ;
ডরব কায় ?
ধরব পায় কার্ সে আর,
বিশ্ব-মাই পার্শ্বে যার ?

আজ্ঞা আকাশ-ডোবানো নেহারি তাঁহারি চাওয়া,
 ঐ শেফালিকা-তলে কে বালিকা চলে ?
 কেশের গন্ধ আনিছে আশিন-হাওয়া !
 এসেছে রে সাথে উৎপলাক্ষী চপলা কুমারী কমলা ঐ,
 সরসিজ-নিভ শুভ্র বালিকা
 এল বীণা-পাণি অমলা ঐ !

এসেছে গণেশ,
 এসেছে মহেশ,
 বাস্‌রে বাস্‌ !
 জোর উছাস্‌ ! !

এল সুন্দর সুর-সেনাপতি,
 সব মুখ এ যে চেনা-চেনা অতি !
 বাস্‌ রে বাস্‌ জোর উছাস্‌ ! !

হিমালয় ! জাগো ! ওঠো আজি,
 তব সীমা লয় হোক ।
 ভুলে যাও শোক—চোখে জ্বল ব'ক
 শান্তির—আজি শান্তি-নিলয় এ আলয় হোক !
 ঘরে ঘরে আজি দীপ জ্বলুক !
 মার আবাহন-গীত্‌ চলুক !
 দীপ জ্বলুক !
 গীত্‌ চলুক ! !

আজ্ঞা কাঁপুক মানব-কলকল্লোলে কিশলয় সম নিখিল ব্যোম্‌ !
 স্বা-গতম্‌ !
 স্বা-গতম্‌ ! !
 মা-তরম্‌ !
 মা-তরম্‌ ! !
 ঐ ঐ ঐ বিশ্ব কণ্ঠে
 বন্দনা-বাণী লুটে—‘বন্দে মাতরম্‌ ! ! !’

ধূমকেতু

আমি যুগে যুগে আসি, আসিয়াছি পুন মহাবিপ্লব হেতু
এই স্রষ্টার শনি মহাকাল ধূমকেতু !

সাত— সাতশো নরক-জ্বালা জ্বলে মম ললাটে,
মম ধূম-কুণ্ডলি করেছে শিবের ত্রিনয়ন ঘন ঘোলাটে !
আমি অশিব তিত্ত অভিষাপ,
আমি স্রষ্টার বৃকে সৃষ্টি-পাপের অনুতাপ-তাপ-হাহাকার—
আর মর্তে সাহারা-গোবি-ছাপ,
আমি অশিব তিত্ত অভিষাপ !

আমি সর্বনাশের ঝাণ্ডা উড়ায়ে বোঁও বোঁও ঘুরি শূন্যে,
আমি বিষ-ধূম-বাণ হানি একা ঘিরে ভগবান-অভিমুখ্যে ।
শোও শন-নন-নন-শন-নন-নন শাঁই শাঁই,
ঘুর পাক্ খাই, ধাই পাই পাই
মম পুচ্ছে জড়ায়ে সৃষ্টি ;
করি উল্কা-অশনি-বৃষ্টি,—

আমি একটা বিশ্ব গ্রাসিয়াছি, পারি গ্রাসিতে এখনো ত্রিশটি ।
আমি অপঘাত দুর্দৈব রে আমি সৃষ্টির অনাসৃষ্টি !

আমি আপনার বিষ-জ্বালা-মদ-পিয়া মোচড় খাইয়া খাইয়া
জোর বৃন্দ হয়ে আমি চলেছি ধাইয়া ভাইয়া !
শুনি মম বিষাক্ত ‘রিরিরিরি’-নাদ
শোনায় দ্বিরেফ-গুঞ্জন সম বিশ্ব-ঘোরার প্রণব-নিবাদ !
ধূজটি-শিখ করাল পুচ্ছে
দশ অবতারে বেঁধে ঝাঁটা করে ঘুরাই উচ্ছে, ঘুরাই—

আমি অগ্নি-কেতন উড়াই !—

আমি যুগে যুগে আসি, আসিয়াছি পুন মহাবিপ্লব হেতু
এই স্রষ্টার শনি মহাকাল ধূমকেতু !

ঐ বামন বিধি সে আমারে ধরিতে বাড়ায়েছিল রে হাত
মম অগ্নি-দাহনে জ্বলে পুড়ে তাই ঠুটো সে জগন্নাথ !
আমি জানি জানি ঐ স্রষ্টার ফাঁকি, সৃষ্টির ঐ চাতুরী,
তাই বিধি ও নিয়মে লাথি মেরে, ঠুকি বিধাতার বৃকে হাতুড়ি ।

আমি জানি জানি ঐ ভুয়ো ঈশ্বর দিয়ে যা হয়নি হবে তাও !
 তাই বিপ্লব আনি বিদ্রোহ করি, নেচে নেচে দিই গোঁফে তাও !
 তোর নিযুত নরকে ফুঁ দিয়ে নিবাই, মৃত্যুর মুখে থুথু দি !
 আর যে যত রাগে বে তারে তত কাল-আশুনের কাতুকুতু দি ।
 মম ত্বরীয় লোকের তির্যক্ গতি ত্বর্য গাজন বাজায়
 মম বিষ নিশ্বাসে মারীভয় হানে অরাজক যত রাজায় !

কচি শিশু-রসনায় ধানি-লঙ্কার পোড়া ঝাল
 আর বন্ধ কারায় গন্ধক ধোঁয়া, এসিড, পটাশ, মোনছাল,
 আর কাঁচা কলিজায় পচা ঘা'র সম সৃষ্টিরে আমি দাহ করি
 আর স্রষ্টারে আমি চুষে খাই !
 পেলে বাহান্ন-শও জাহান্নমেও আধা চুমুকে সে শুষে যাই !

আমি যুগে যুগে আসি আসিয়াছি পুন মহাবিপ্লব হেতু—
 এ ই স্রষ্টার শনি মহাকাল ধূমকেতু !
 আমি শি শি শি প্রলয়-শিশ্ দিয়ে ঘুরি কৃতঘ্নী ঐ বিশ্বমাতার শোকাগ্নি,
 আমি ত্রিভুবন তার পোড়ায়ে মারিয়া আমিই করিব মুখাগ্নি !
 তাই আমি ঘোর তিক্ত সুখে রে, একপাক ঘুরে বোঁও করে ফের দুপাক নি !
 কৃতঘ্নী আমি কৃতঘ্নী ঐ বিশ্বমাতার শোকাগ্নি !

পঙ্কর মম খর্পরে জ্বলে নিদারুণ যেই বৈশ্বানর—

শোন্ রে মর, শোন্ অমর !—

সে যে তোদের ঐ বিশ্বপিতার চিতা !

এ চিতাগ্নিতে জগদীশ্বর পুড়ে ছাই হবে, হে সৃষ্টি জানো কি তা ?

কি বলো ? কি বলো ? ফের বলো ভাই আমি শয়তান-মিতা !

হো হো ভগবানে আমি পোড়াব বলিয়া জ্বালায়েছি বুকো চিতা !

ছোট শন শন শন ঘর ঘর ঘর সাঁই সাঁই !

ছোট পাই পাই !

তুই অভিশাপ তুই শয়তান তোর অনন্তকাল পরমাই !

ওরে ভয় নাই তোর মার নাই ! !

তুই প্রলয়ঙ্কর ধূমকেতু,

তুই উগ্র ক্ষিপ্ত তেজ-মরীচিকা নস্ অমরার ঘুম-সেতু

তুই ভৈরব ভয় ধূমকেতু !

আমি যুগে যুগে আসি আসিয়াছি পুন মহাবিপ্লব হেতু
এই স্রষ্টার শনি মহাকাল ধূমকেতু !

ঐ ঈশ্বর-শির উল্লঙ্ঘিতে আমি আগুনের সিঁড়ি,
আমি বসিব বলিয়া পেতেছে ভবানী ব্রহ্মার বুক পিড়ি !
খ্যাপা মহেশের বিক্ষিপ্ত পিনাক, দেবরাজ-দস্তোলি
লোকে বলে মোরে, শুনে হাসি আমি আর নাচি বব-বম্ বলি !
এই শিখায় আমার নিযুত ত্রিশূল বাণুলি বজ্র-ছড়ি
ওরে ছড়ানো রয়েছে, কত যায় গড়াগড়ি !
মহা সিংহাসনে সে কাঁপিছে বিশ্ব-সম্রাট নিরবধি,
তার ললাটে তপ্ত অভিশাপ-ছাপ ঐকে দিই আমি যদি !
তাই টিটকিরি দিয়ে হাहा হেসে উঠি,
সে হাসি গুমরি লুটায় পড়ে রে তুফান বনঝা সাইক্লোনে টুটি !

আমি বাজাই আকাশে তালি দিয়া 'তাতা-উর্-তাক'
আর সোঁও সোঁও করে প্যাচ দিয়ে খাই চিলে-ঘুড়ি সম ঘুরপাক !
মম নিশাস আভাসে অগ্নি-গিরির বুক ফেটে ওঠে ঘুৎকার
আর পুচ্ছে আমার কোটি নাগ-শিশু উল্কায়ে বিষ্-ফুৎকার !

কাল বাঘিনী যেমন ধরিয়া শিকার
তখনি রক্ত শোষে না রে তার,
দৃষ্টি-সীমায় রাখিয়া তাহারে উগ্রচণ্ড-সুখে
পুচ্ছ সাপটি খেলা করে আর শিকার মরে সে ধুঁকে !
তেমনি করিয়া ভগবানে আমি
দৃষ্টি-সীমায় রাখি দিব্যায়ী
ঘিরিয়া ঘিরিয়া খেলিতেছি খেলা, হাসি পিশাচের হাসি
এই অগ্নি-বাঘিনী আমি যে সর্বনাশী !

আজ রক্ত-মাতাল উল্লাসে মাতি রে—
মম পুচ্ছে ঠিকরে দশগুণ ভাতি,
রক্ত রুদ্র উল্লাসে মাতি রে !
ভগবান ? সে তো হাতের শিকার !—মুখে ফেনা উঠে মরে !
ভয়ে কাঁপিছে, কখন পড়ি গিয়া তার আহত বুকের 'পরে !
অথবা যেন রে অসহায় এক শিশুরে ঘিরিয়া

অজগর কাল-কেউটে সে কোনো ফিরিয়া ফিরিয়া
চায়, আর ঘোরে শন্ শন্ শন্,
ভয়-বিহ্বল শিশু তার মাঝে কাঁপে রে যেমন—
তেমনি করিয়া ভগবানে ঘিরে
ধূমকেতু-কালনাগ অভিষাপ ছুটে চলেছি রে ;
আর সাপে-ঘেরা অসহায় শিশু সম
বিধাতা তাদের কাঁপিছে রুদ্র ঘূর্ণির মাঝে মম !

আজিও ব্যথিত সৃষ্টির বৃকে ভগবান কাঁদে ত্রাসে,
স্রষ্টার চেয়ে সৃষ্টি পাছে বা বড় হয়ে তারে গ্রাসে !

কামাল পাশা

[তখন শরৎ-সন্ধ্যা। আসমানের আঙিনা তখন কারবালা ময়দানের মতো খুনখারাবির রঙে রঙিন। সেদিনকার মহা-আহবে গ্রীক-সৈন্য সম্পূর্ণরূপে বিধ্বস্ত হইয়া গিয়াছে। তাহাদের অধিকাংশ সৈন্যই রণস্থলে হত অবস্থায় পড়িয়া রহিয়াছে। বাকি সব প্রাণপণে পৃষ্ঠ প্রদর্শন করিতেছে। তুরস্কের জাতীয় সৈন্যদলের কাণ্ডারী বিস্বত্রাস মহাবাহু কামাল-পাশা মহাহর্ষে রণস্থল হইতে তাম্বুতে ফিরিতেছেন। বিজয়োন্মত্ত সৈন্যদল মহাকল্লোলে অশ্ব-ধরণী কাঁপাইয়া তুলিতেছে। তাহাদের প্রত্যেকের বৃকে পিঠে দুই জন করিয়া নিহত বা আহত সৈন্য বাঁধা। যাহারা ফিরিতেছে তাহাদেরও অঙ্গ-প্রত্যঙ্গ গোলাগুলির আঘাতে, বেয়নটের খোঁচায় ক্ষতবিক্ষত, পোষাক-পরিচ্ছদ ছিন্নভিন্ন, পা হইতে মাথা পর্যন্ত রক্তরঞ্জিত। তাহাদের কিন্তু সে দিকে জ্রাক্ষপও নাই। উদ্দাম বিজয়োন্মাদনার নেশায় মৃত্যু-কাতর রণক্লান্তি ভুলিয়া গিয়া তাহারা যেন খেপিয়া উঠিয়াছে। ভাঙা সঙ্গীনের আগায় রক্ত-ফেজ উড়াইয়া ভাঙা-খাটিয়া-আদি-দ্বারা-নির্মিত এক অভিনব চৌদলে কামালকে বসাইয়া বিষম হস্তা করিতে করিতে তাহারা মার্চ করিতেছে। ভূমিকম্পের সময় সাগর-কল্লোলের মতো তাহাদের বিপুল বিজয়ধ্বনি আকাশে-বাতাসে যেন কেমন একটা ভীতি-কম্পনের সৃজন করিতেছে। বহু দুর্ হইতে সে রণ-তাণ্ডব নৃত্যের ও প্রবল ভেরী-তুরীর ঘন রোল শোনা যাইতেছে। অত্যধিক আনন্দে অনেকেরই ঘন ঘন রোমাঞ্চ হইতেছিল। অনেকেরই চোখ দিয়া অশ্রু গড়াইয়া পড়িতেছিল।]

[সৈন্য-বাহিনী দাঁড়াইয়া। হাবিলদার-মেজর তাহাদের মার্চ করাইবার জন্য প্রস্তুত হইতেছিল। বিজয়োন্মত্ত সৈন্যগণ গাহিতেছিল,—]

ঐ খেপেছে পাগলি মায়ের দামাল ছেলে কামাল ভাই,
অসুর-পুরে শোর উঠেছে জোরসে সামাল সামাল তাই।

কামাল ! তু নে কামাল কিয়া ভাই !
 হো হো কামাল ! তু নে কামাল কিয়া ভাই !

[হাবিলদার-মেজর মার্চের হুকুম করিল,—কুইক্ মার্চ !]

লেফট ! রাইট ! লেফট ! !
 লেফট ! রাইট ! লেফট ! !

[সৈন্যগণ গাহিতে গাহিতে মার্চ করিতে লাগিল]

ঐ খেপেছে পাগলি মায়ের দামাল ছেলে কামাল ভাই,
 অসুর-পুরে শোর উঠেছে জোরসে সামাল সামাল তাই !
 কামাল ! তু নে কামাল কিয়া ভাই !
 হো হো কামাল ! তু নে কামাল কিয়া ভাই !

[হাবিলদার-মেজর :—লেফট ! রাইট !]

সাববাস্ ভাই ! সাববাস্ দিই, সাববাস্ তোর শমশেরে ।
 পাঠিয়ে দিলি দুশমনে সব যম-ঘর একদম-সে রে !
 বল্ দেখি ভাই বল্ হাঁ রে,
 দুনিয়ার কে ডব্ করে না তুর্কির তেজ তলোয়ারে ?

[লেফট ! রাইট ! লেফট !]

খুব কিয়া ভাই খুব কিয়া !
 বুজ্‌দিল্ ঐ দুশমন্ সব বিলকুল্ সাফ হো গিয়া !
 খুব কিয়া ভাই খুব কিয়া !

হুরো হো !

হুরো হো !

দস্যুগুলোয় সামলাতে যে এমনি দামাল কামাল চাই !

তু নে — তুমি। কামাল কিয়া — অভাবনীয় কাণ্ড করলে, অসম্ভব করলে ! [কামাল মানে কিন্তু 'পূর্ণ' শমশেরে — তরবারিকে। বিলকুল সাফ হো গিয়া — একদম পরিষ্কার হয়ে গেছে। খুব কিয়া — আচ্ছা করেছে। বুজ্‌দিল — ভীরু, কাপুরুষ।

কামাল ! তু নে কামাল কিয়া ভাই !
হো হো কামাল ! তু নে কামাল কিয়া ভাই !

[হাবিলদার-মেজর :—সারাস সিপাই ! লেফট ! রাইট ! লেফট !]

শির হতে এই পাঁও-তক্ ভাই লাল-লালে-লাল খুন মেখে
রণ-ভিত্তদের শাস্তি-বাণী শুন্বে কে ?
পিণ্ডারিদের খুন-রঙিন
নোখ-ভাঙা এই নীল সঙিন
তৈয়ার হেয় হৃদম ভাই ফাড়তে যিগর্ শত্রুদের !
হিংসুক-দল ! জোর তুলেছি শোধ তাদের !
সাবাস্ জোয়ান ! সাবাস্ !

ক্ষীণজীবী ঐ জীবগুলোকে পায়ের তলেই দাবাস্—
এমনি করে রে—
এমনি জোরে রে—
ক্ষীণজীবী ঐ জীবগুলোকে পায়ের তলেই দাবাস্ !—
ঐ চেয়ে দ্যাখ্ আসমানে আজ রক্ত-রবির আভাস !—
সাবাস্ জোয়ান ! সাবাস্ !!

[লেফট ! রাইট ! লেফট]

হিংসুটে ঐ জীবগুলো ভাই নাম ডুবালে সৈনিকের,
তাই তারা আজ নেস্ত-নাবুদ, আমরা মোটেই হইনি জের !
পরের মুলুক লুট করে খায় ডাকাত তারা ডাকাত !
তাই তাদের তরে বরাদ্দ ভাই আঘাত শুধু আঘাত !
কি বলো ভাই শ্যাঙাত ?
হুররো হো !
হুররো হো !!
দনুজ দলে দলতে দাদা এমনি দামাল কামাল চাই !
কামাল ! তু নে কামাল কিয়া ভাই !
হো হো কামাল ! তু নে কামাল কিয়া ভাই !!

[হাবিলদার মেজর : রাইট্ হইন্ ! লেফট্ রাইট্ ! লেফট্ !
সৈন্যগণ ডানদিকে মোড় ফিরিল।]

আজাদ মানুষ বন্দী করে, অধীন করে স্বাধীন দেশ,
কুল মুলুকের কুষ্টি করে জোর দেখালে কদিন বেশ,
মোদের হাতে তুর্কি-নাচন নাচলে তাখিন্ তাখিন্ শেষ !

ছররো হো !

ছররো হো !

বদ-নসিবের বরাত খারাব বরাদ্দ তাই করলে কি না আল্লায়,
পিশাচগুলো পড়ল এসে পেছায় এই পাগলাদেরই পাছায় !

এই পাগলাদেরই পাছায় ! !

ছররো হো !

ছররো—

ওদের কল্লা দেখে আল্লা ডরায়, হল্লা শুধু হল্লা,

ওদের হল্লা শুধু হল্লা,

এক মুর্গির জোর গায়ে নেই, ধরতে আসেন তুর্কি-তাজি
মর্দ গাজি মোল্লা !

হাঃ ! হাঃ ! হাঃ !

হেসে নাড়িই ছেড়ে বা !

হা হা হাঃ ! হাঃ ! হাঃ !

[হাবিলদার-মেজর—সাবাস সিপাই ! লেফট্ রাইট্ ! লেফট্ !

সাবাস সিপাই ! ফের বল ভাই !]

ঐ খেপেছে পাগলি মায়ের দামাল ছেলে কামাল ভাই !

অসুর-পুরে শোর উঠেছে জোরসে সামাল সামাল তাই !

কামাল ! তু নে কামাল কিয়া ভাই !

হো হো কামাল ! তু নে কামাল কিয়া ভাই !

[হাবিলদার-মেজর :—লেফট্ হুইল্ ! য়াজ্ য়ু ওয়্যার !—রাইট্ হুইল্ !—

লেফট্ ! রাইট্ ! লেফট্ ! !]

[সৈন্যদের আঁখির সামনে অস্ত-রবির আশ্চর্য রঙের খেলা ভাসিয়া উঠিল ।]

দেখ্ কি দোস্ত অমন করে? হৌ হৌ হৌ !
 সত্যি তো ভাই !—সঙ্কেটা আজ দেখতে যেন সৈনিকেরই বৌ !
 শহীদ সেনার টুকটুকে বৌ লাল-পিরাহান-পরা,
 স্বামীর খুনের ছোপ-দেওয়া, তায় ডগডগে আনকোরা !—
 না না না,—কল্জে যেন টুকরো-করে-কাটা
 হাজার তরুণ শহীদ বীরের,—শিউরে উঠে গাটা !
 আস্মানের ঐ সিং-দরজায় টাঙিয়েছে কোন্ কসাই !
 দেখতে পেলে এক্ষুনি গে এই ছোরাটা কল্জেতে তার বসাই !
 মুণ্ডুটা তার খসাই !
 গোস্বাতে আর পাইনে ভেবে কি যে করি দশাই !

[হাবিলদার-মেজর — সাবাস সিপাই ! লেফট ! রাইট ! লেফট !]
 [ঢালু পার্বত্য পথ, সৈন্যগণ বৃকের পিঠের নিহত ও আহত সৈন্যদের ধরিয়া সম্ভর্পণে নামিল।]

আহা কচি ভাইরা আমার রে !
 এমন কাঁচা জ্ঞানগুলো খান্ খান্ করেছে কোন্ সে চামার রে ?
 আহা কচি ভাইরা আমার রে ! !

[সামনে উপত্যকা। হাবিলদার মেজর :—লেফট ফর্ম ! সৈন্য-বাহিনীর মুখ হঠাৎ বামদিকে ফিরিয়া
 গেল ! হাবিলদার মেজর :—ফর্ওয়ার্ড ! লেফট ! রাইট ! লেফট !]

আস্মানের ঐ আঙুরাখা
 খুন-খারাবির রঙ মাখা
 কি খুবসুরৎ বাঙ রে বা !
 জোর বাজা ভাই কাহারবা !
 হোক না ভাই এ কারবালা ময়দান—
 আমরা যে গাই সাচ্চারই জয়-গান !
 হোক না এ তোর কারবালা ময়দান ! !
 হুররো হো !
 হুররো—

[সামনে পার্বত্য পথ—হঠাৎ যেন পথ হারাইয়া ফেলিয়াছে। হাবিলদার-মেজর পথ ঝুজিতে লাগিল। হুকুম দিয়া
 গেল,—‘মার্ক টাইম্ !’ সৈন্যগণ এক স্থানেই দাঁড়াইয়া পা আছড়াইতে লাগিল—]

পিরাহান—পিরান। গোস্বা—ক্রোধ। খুবসুরৎ—সুন্দর।

দ্রাম্ ! দ্রাম্ ! দ্রাম্ !

লেফট্ ! রাইট্ ! লেফট্ !

দ্রাম্ ! দ্রাম্ ! দ্রাম্ !

আস্মানে ঐ ভাস্মান যে মস্ত দুটো রঙের তাল,
একটা নিবিড় নীল—সিয়া আর একটা খুবই গভীর লাল,—

বুঝলে ভাই ! ঐ নীল সিয়াটা শত্রুদের !

দেখতে নারে কারুর ভালো,

তাইতে কালো রক্ত-ধারার বইছে শিরায় স্রোত ওদের।

হিংস্র ওরা হিংস্র পশুর দল !

গধু ওরা, লুপ্ত ওদের লক্ষ্য অসুর বল—

হিংস্র ওরা হিংস্র পশুর দল !

জালিম ওরা অত্যাচারী !

সার জেনেছে সত্য যাহা হত্যা তারই !

জালিম ওরা অত্যাচারী !

সৈনিকের এই গৈরিকে ভাই—

জোর অপমান করলে ওরাই,

তাই তো ওদের মুখ কালো আজ, খুন যেন নীল জল !—

ওরা হিংস্র পশুর দল !

ওরা হিংস্র পশুর দল ! !

[হাবিলদার—মেজর পথ ঝুঁজিয়া ফিরিয়া অর্ডার দিল—ফরওয়ার্ড ! লেফট্ হইল—

সৈন্যগণ আবার চলিতে লাগিল—লেফট্ রাইট্ ! লেফট্ !]

সাক্ষা ছিল সৈন্য যারা শহীদ হলো মরে।

তোদের মতন পিঠ ফেরেনি প্রাণটা হাতে করে,—

ওরা শহীদ হলো মরে !

পিটনি খেয়ে পিঠ যে তোদের টিট হয়েছে ! কেমন !

পৃষ্ঠে তোদের বর্শা বেঁধা, বীর সে তোরা এমন !

মুর্দারা সব যুদ্ধে আসিস্ ! যা যা !

খুন দেখেছিস্ বীরের ? হা দেখ টকটকে লাল কেমন গরম তাজা !

মুর্দারা সব যা যা ! !

[বলিয়াই কটিদেশ হইতে ছোরা খুলিয়া হাতের রক্ত লইয়া দেখাইল]

ঐরাই বলেন হবেন রাজা !
আরে যা যা ! উচিত সাজা
তাই দিয়েছে শত্রু ছেলে কামাল ভাই !

[হাবিলদার মেজর :—সাবাস সিপাই !]

এই তো চাই ! এই তো চাই !
থাকলে স্বাধীন সবাই আছি, নেই তো নাই, নেই তো নাই !
এই তো চাই ! !

[কতকগুলি লোক অশ্রুপূর্ণ নয়নে এই দৃশ্য দেখিবার জন্য ছুটিয়া আসিতেছিল।
তাহাদের দেখিয়া সৈন্যগণ আরও উত্তেজিত হইয়া উঠিল।]

মার দিয়া ভাই মার দিয়া !
দুশ্মন সব হার গিয়া !
কিন্মা ফতে হো গিয়া ।
পরওয়া নেহি, যা নে দো ভাই যো গিয়া !
কিন্মা ফতে হো গিয়া !
হুরো হো !
হুরো হো !

[হাবিলদার-মেজর :—সাবাস জোয়ান ! লেফট ! রাইট !]

জোরসে চলো পা মিলিয়ে,
গা হিলিয়ে,
এমনি করে হাত দুলিয়ে !
দাদরা তালে 'এক দুই তিন' পা মিলিয়ে
ঢেউএর মতন যাই !
আজ স্বাধীন এ দেশ ! আজাদ মোরা বেহেশতও না চাই !
আর বেহেশতও না চাই ! !

[হাবিলদার-মেজর :—সাবাস সিপাই ! ফের বল ভাই !]

ঐ খেপেছে পাগলি মায়ের দামাল ছেলে কামাল ভাই,
অসুর-পুরে শোর উঠেছে জোরসে সামাল ভাই !

কামাল ! তু নে কামাল কিয়া ভাই !
হো হো কামাল ! তু নে কামাল কিয়া ভাই ! !

[সৈন্যদল এক নগরের পার্শ্ব দিয়া চলিতে লাগিল। নগর-বাসিনীরা ঝরকা হইতে মুখ বাড়াইয়া এই মহান দৃশ্য দেখিতেছিল ; তাহাদের চোখ-মুখ আনন্দাক্রান্তে আগ্রুত। আজ বধূর মুখের বোরকা খসিয়া পড়িয়াছে। ফুল ছড়াইয়া হাত দুলাইয়া তাহারা বিজয়ী বীরদের অভ্যর্থনা করিতেছিল। সৈন্যগণ চীৎকার করিয়া উঠিল।]

ঐ শুনেছিস? ঝরকাতে সব বলছে ডেকে বৌ-দলে,
'কে বীর তুমি? কে চলেছ চৌদলে?'
চিনিসনে কি? এমন বোকা বোনগুলি সব!—কামাল এ যে কামাল!
পাগলি মায়ের দামাল ছেলে! ভাই যে তোদের!
তা না হলে কার হবে আর রৌশন্ এমন জামাল?
কামাল এ যে কামাল!!
উড়িয়ে দেবো পুড়িয়ে দেবো ঘর-বাড়ি সব সামাল!
ঘর-বাড়ি সব সামাল!!
আজ আমাদের খুন ছুটেছে, হোশ টুটেছে,
ডগমগিয়ে জোশ উঠেছে!
সাম্নে থেকে পালাও!
শোহরত দাও নওরাতি আজ! হর ঘরে দীপ জ্বালাও!
সাম্নে থেকে পালাও!
যাও ঘরে দীপ জ্বালাও!!

[হাবিলদার-মেজর :-লেফট ফর্ম! লেফট! রাইট! লেফট!—ফরওয়ার্ড!]

[বাহিনীর মুখ হঠাৎ বামদিকে ফিরিয়া গেল। পার্শ্বই পরিবার সারি। পরিখা-ভর্তি নিহত সৈন্যের দল পচিতেছে এবং কতকগুলি অ-সামরিক নগরবাসী তাহা ডিঙাইয়া ডিঙাইয়া চলিতেছে।]

ইস্! দেখেছিস! ঐ কারা ভাই সাম্নে চলেন পা,
ফস্কে মরা আধ-মরাদের মাড়িয়ে ফেলেন বা!
ও তাই শিউরে ওঠে গা!
হাঃ হাঃ হাঃ হাঃ!

মরল যে সে মরেই গেছে,
বাঁচল যারা রইল বেঁচে !
এই তো জানি সোজা হিসাব ! দুঃখ কি তার আঁ ?
মরায় দেখে ডরায় এরা ! ভয় কি মরায় ? বাঃ
হাঃ হাঃ হাঃ হাঃ

[সম্মুখে সঙ্কীর্ণ ভগ্ন সেতু। হাবিলদার-মেজর অর্ডার দিল—‘ফর্ম্ ইনটু সিঙ্গল লাইন।’ এক একজন করিয়া বুকের পিঠের নিহত ও আহত ভাইদের চাপিয়া ধরিয়া অতি সন্তর্পণে ‘স্লো মার্চ’ করিয়া পার হইতে লাগিল।]

সত্যি কিন্তু ভাই
যখন মোদের বক্ষে-বাঁধা ভাইগুলির এই মুখের পানে চাই—
কেমন সে এক ব্যথায় তখন প্রাণটা কাঁদে যে সে !
কে যেন দুই বজ্র-হাতে চেপে ধরে কল্‌জেনানা পেষে !
নিজের হাজার ঘায়েল জখম ভুলে তখন ডুকরে কেন কেঁদেও ফেলি শেষে !
কে যেন ভাই কল্‌জেনানা পেষে ! !
ঘুমোও পিঠে, ঘুমোও বুক, ভাইটি আমার, আহা !
বুক যে ভরে হাহাকারে যতই তোরে সাব্বাস দিই,
যতই বলি বাহা !
লক্ষ্মীমণি ভাইটি আমার, আহা ! !
ঘুমোও ঘুমোও মরণ-পারের ভাইটি আমার, আহা ! !
অস্ত-পারের দেশ পারায়ে বহু সে দূর তোদের ঘরের রাহা !
ঘুমোও এখন ঘুমোও ঘুমোও ভাইটি ছোট আহা !
মরণ-বধূর লাল রাঙা বর ! ঘুমো !
আহা, এমন চাঁদমুখে তোর কেউ দিল না চুমো !

হতভাগা রে !
মরেও যে তুই দিয়ে গেলি বহু দাগা রে
না জানি কোন্ ফুটে-চাওয়া মানুষ-কুঁড়ির হিয়ায় !
তরুণ জীবন এমনি গেল, একটি রাতও পেলিনে রে বুকে কোনো প্রিয়ায় !
অরুণ খুনের তরুণ শহীদ ! হতভাগা রে !
মরেও যে তুই দিয়ে গেলি বহু দাগা রে !
তাই যত আঙ্গ লিখনে-ওয়ালা তোদের মরণ ফুর্তি-সে জোর লেখে !
এক লাইনে দশ হাজারের মৃত্যু-কথা ! হাসি রকম দেখে !

মরলে কুকুর ওদের, ওরা শহীদ-গাথার বই লেখে !
 খবর বেবোয় দৈনিকে,
 আর একটি কথায় দুঃখ জানান, 'জোর মরেছে দশটা হাজার সৈনিকে !'
 আঁখির পাতা ভিজল কি না কোনো কালো চোখের,
 জানল না হয় এ-জীবনে ঐ সে তরুণ দশটি হাজার লোকের !
 পচে মরিস পরিখাতে, মা-বোনেরাও শুনে বলে 'বাহা' !
 সৈনিকেরই সত্যিকারের ব্যথার ব্যথী কেউ কি রে নেই? আহা !—
 আয় ভাই তোর বৌ এল ঐ সন্ধ্যা মেয়ে রক্ত-চেলি পরে,
 আঁধার-শাড়ি পরবে এখন পশ্বে যে তোর গোরের বাসর-ঘরে !—
 ভাবতে নারি, গোরের মাটি করবে মাটি এ মুখ কেমন করে—
 সোনা মানিক ভাইটি আমার ওরে !
 বিদায়-বেলায় আরেকটিবার দিয়ে যা ভাই চুমো !
 অনাদরের ভাইটি আমার ! মাটির মায়ের কোলে এবার ঘুমো ! !

[নিহত সৈন্যদের নামাইয়া রাখিয়া দিয়া সেতু পার হইয়া আবার জোরে মার্চ করিতে করিতে তাহাদের রক্ত গরম হইয়া উঠিল।]

ঠিক বলেছ দোস্ত তুমি !
 চোস্ত কথা ! আয় দেখি—তোর হস্ত চুমি !
 মৃত্যু এরা জয় করেছে, কান্না কিসের ?
 আব-জম-জম আনলে এরা, আপনি পিয়ে কলসি বিমের !
 কে মরেছে ? কান্না কিসের ?
 বেশ করেছে !
 দেশ বাঁচাতে আপনারি জ্ঞান শেষ করেছে !
 বেশ করেছে ! !
 শহীদ ওরাই শহীদ !
 বীরের মতন প্রাণ দিয়েছে খুন ওদেরি লোহিত !
 শহীদ ওরাই শহীদ ! !

[এইবার তাহাদের তাম্বু দেখা গেল। মহাবীর আনোয়ার পাশা বহু সৈন্যসামন্ত ও সৈনিকদের আত্মীয়-স্বজন লইয়া বিজয়ী বীরদের অভ্যর্থনা করিতে আসিতেছেন দেখিয়া সৈন্যগণ আনন্দে আত্মহারা হইয়া 'ডবল মার্চ' করিতে লাগিল]

হুঁরো হো !

হুঁরো হো ! !

ভাই-বেরাদর পালাও এখন ! দূর রহো ! দূর রহো ! !

হুঁরো হো ! হুঁরো হো !

[কামাল পাশাকে কোলে করিয়া নাচিতে লাগিল]

হৌ হৌ হৌ ! কামাল জিতা রও !

কামাল জিতা রও !

ও কে আসে ? আনোয়ার ভাই?—

আনোয়ার ভাই ! জানোয়ার সব সাফ ! !

জোর নাচো ভাই ! হৃদম্ দাও লাফ !

আজ জানোয়ার সব সাফ !

হুঁরো হো ! হুঁরো হো ! !

সব-কুছ আব্ দূর রহো !—হুঁরো হো ! হুঁরো হো ! !

রণ জিতে জোর মন মেতেছে !—সালাম সবায় সালাম !—

নাচনা থামা রে !

জখ্মি ঘায়েল ভাইকে আগে আস্তে নামা রে !

নাচনা থামা রে !—

[আহতদেরে নামাইতে নামাইতে]

কে ভাই ? হাঁ হাঁ, সালাম !

—ঐ শোন্ শোন্ সিপাহ্-সালার কামাল ভাই-এর কালাম !

[সেনাপতির অর্ডার আসিল]

‘সাবাস ! থামো ! হো ! হো !

সাবাস ! হুন্ট ! এক ! দো !’

[এক নিমিষে সমস্ত কল-রোল নিস্তব্ধ হইয়া গেল। তখনো কি তারায় তারায় যেন ঐ বিজয়-গীতির হারা-সুর বাজিয়া বাজিয়া ক্রমে ক্ষীণ হইতে ক্ষীণতর হইয়া মিলিয়া গেল—]

ঐ থেপেছে পাগলি মায়ের দামাল ছেলে কামাল ভাই !

অসুর-পুরে শোর উঠেছে জোরসে সামাল সামাল তাই !

কামাল ! তু নে কামাল কিয়া ভাই।

হো হো, কামাল ! তু নে কামাল কিয়া ভাই ! !

আনোয়ার

[স্থান—প্রহরী-বেষ্টিত অন্ধকার কারাগৃহ, কনস্ট্যান্টিনোপল।

কাল—অমাবস্যার নিশীথ রাত্রি।]

[চারিদিকে নিস্তব্ধ নির্বাক। সেই মৌনা নিশীথিনীকে ব্যথা দিতেছিল শুধু কাফ্রি-সাত্ত্বীর পায়চারির বিশী খটখট শব্দ। ঐ জিন্দানখানায় মহাবাহু আনোয়ারের জাতীয়-সৈন্যদলের সহকারী এক তরুণ সেনানী বন্দী। তাহার কুঞ্চিত দীর্ঘ কেশ, ডাগর চোখ, সুন্দর গঠন—সমস্ত-কিছুতে যেন একটা ব্যথিত-বিদ্রোহের তিক্ত-ক্রন্দন ছলছল করিতেছিল। তরুণ প্রদীপ্ত মুখমণ্ডলে চিস্তার রেখাপাতে তাহাকে তাহার বয়স অপেক্ষা অনেকটা বেশি বয়স্ক বোধ হইতেছিল।

সেইদিনই ধামা-ধরা সরকারের কোর্ট-মার্শালের বিচারে নির্দ্ধারিত হইয়া গিয়াছে যে, পরদিন নিশিভাৱে তরুণ সেনানীকে তোপের মুখে উড়াইয়া দেওয়া হইবে।

আজ হতভাগ্যের সেই মুক্তি-নিশীথ, জীবনের সেই শেষরাত্রি। তাহার হাতে, পায়ে, কটিদেশে, গর্দানে উৎপীড়নের লৌহ-শৃঙ্খল। শৃঙ্খল-ভারাতুর তরুণ সেনানী স্বপ্নে তাহার ‘মা’-কে দেখিতেছিল। সহসা চীৎকার করিয়া সে জাগিয়া উঠিল। তাহার পর চারিদিকে কাতর নয়নে একবার চাহিয়া দেখিল, কোথাও কেহ নাই। শুধু হিম্যানি-সিক্ত বায়ু হা হা স্বরে কাঁদিয়া গেল, ‘হায় মাতৃহারা!’

স্বদেশবাসীর বিশ্বাসঘাতকতা স্মরণ করিয়া তরুণ সেনানী ব্যর্থ-রোষে নিজের বাম বাহু নিজের দংশন করিয়া ক্ষত-বিক্ষত করিতে লাগিল। কারাগৃহের লৌহ-শলাকায় তাহার শৃঙ্খলিত দেহভার বারেবারে নিপতিত হইয়া কারা-গৃহ কাঁপাইয়া তুলিতেছিল।

এখন তাহার অশ্রু-গুরু আনোয়ারকে মনে পড়িল। তরুণ বন্দী চীৎকার করিয়া উঠিল, ‘আনোয়ার!’—]

আনোয়ার ! আনোয়ার !

দিলাওয়ার তুমি, জোর তলওয়ার হানো, আর

নেস্ত-ও-নাবুদ করো, মারো যত জানোয়ার !

আনোয়ার ! আফসোস্ !

বখতেরই সাফ্ দোষ,

রক্তেরও নাই ভাই আর সে যে তাপ জোশ,

ভেঙে গেছে শমশের—পড়ে আছে খাপ কোষ !

আনোয়ার ! আফসোস্ !

দিলাওয়ার—সাহসী। বখত—অদৃষ্ট। জোশ—উত্তেজনা।

আনোয়ার ! আনোয়ার !
 সব যদি সুমসাম, তুমি কেন কাঁদো আর ?
 দুনিয়াতে মুসলিম আজ পোষা জানোয়ার !
 আনোয়ার ! আর না !—
 দিল্ কাঁপে কার না ?
 তলওয়ারে তেজ নাই !—তুচ্ছ স্মার্গা,
 ঐ কাঁপে থরথর মদিনার দ্বার না ?
 আনোয়ার ! আর না !

আনোয়ার ! আনোয়ার !
 বুক ফেড়ে আমাদের কলিজাটা টানো, আর
 খুন করো—খুন করো ভীক যত জানোয়ার !
 আনোয়ার ! জিজির—
 পরা মোরা যিজির !
 শক্তনে বাজে শোনো রোণা রিণ-কিণ কির,—
 নিবু নিবু ফোয়ারা বহির ফিন্‌কির !
 গর্দানে জিজির !

আনোয়ার ! আনোয়ার !
 দুর্বল এ গিদধড়ে কেন তড়পানো আর ?
 জোরওয়ার শের কই ?—জেরবার জানোয়ার !
 আনোয়ার ! মুশকিল
 জাগা কঙ্কুশ-দিল,
 ঘিরে আসে দাবানল তবু নাই হুঁশ তিল !
 ভাই আজ শয়তান ভাই—এ মারে ঘুষ কিল !
 আনোয়ার ! মুশকিল !

আনোয়ার ! আনোয়ার !
 বেইমান মোরা, নাই জান আখ-খানও আর ।
 কোথা খোঁজো মুসলিম ?—শুধু বুনো জানোয়ার !
 আনোয়ার ! সব শেষ !—
 দেহে খুন অবশেষ !—

ঝুটা তেরি তলওয়ার ছিন্ লিয়া যব্ দেশ !
আওরত সম ছি ছি ত্রন্দন রব পেশ ! !
আনোয়ার ! সব শেষ !

আনোয়ার ! আনোয়ার !
জনহীন এ বিয়াবানে মিছে পস্তানো আর !
আজ্ঞো যারা বেঁচে আছে তারা খ্যাপা জানোয়ার !
আনোয়ার !—কেউ নাই !
হাথিয়ার ?—সেও নাই !
দরিয়াও থম্‌থম্‌ নাই তাতে ঢেউ, ছাই !
জিঞ্জির গলে আজ বেদুঈন—দেও ভাই !
আনোয়ার ! কেউ নাই !

আনোয়ার ! আনোয়ার !
যে বলে সে মুসলিম—জিভ ধরে টানো তার !
বেইমান জানে শুধু জানটা বাঁচানো সার !
আনোয়ার ! ধিক্কার !
কাঁধে বুলি ভিক্ষার—
তলওয়ারে শুরু যার স্বাধীনতা শিক্ষার !
যারা ছিল দুর্দম আজ তারা দিক্‌দার !
আনোয়ার ! ধিক্কার !

আনোয়ার ! আনোয়ার !
দুনিয়াটা খুনিয়ার, তবে কেন মানো আর
রুধিরের লোহু আঁখি ?—শয়তানি জানো সার !
আনোয়ার ! পঞ্জায়
বৃথা লোকে সমঝায়,
ব্যথা—হত বিদ্রোহী দিল্ নাচে বন্‌ঝায়,
খুন—খেগো তলওয়ার আজ শুধু রণ চায়,
আনোয়ার ! পঞ্জায় !
আনোয়ার ! আনোয়ার !

পাশা তুমি নাশা হও মুসলিম-জানোয়ার,
 ঘরে যত দুশমন, পরে কেন হানো মার ?—
 আনোয়ার ! এসো ভাই !
 আজ সব শেষও যাই !—
 ইসলামও ডুবে গেল, মুক্ত স্বদেশও নাই !—
 তেগ ত্যাজি বরিয়াছি ভিখারির বেশও তাই !
 আনোয়ার ! এসো ভাই ! !

[সহসা কাফ্রি সাত্রির ভীম চ্যালেঞ্জ প্রলয়-ডম্বরু-ধ্বনির মতো হুঙ্কার দিয়া উঠিল—‘এয় নৌজওয়ান, ইশিয়ার !’ অধীর ক্ষোভে তিক্ত রোষে তরুণের দেহের রক্ত টগবগ করিয়া ফুটিয়া উঠিল ! তাহার কটিদেশের, গর্দানের, পায়ের শৃঙ্খল খানখান হইয়া টুটিয়া গেল, শুধু হাতের শৃঙ্খল টুটিল না। সে সিংহ-শাবকের মতো গর্জন করিয়া উঠিল—]

এয় খোদা ! এয় আলি ! লাও মেরি তলোয়ার !

[সহসা তাহার ক্লান্ত আঁখির চাওয়ায় তুরস্কের বন্দিনী মাতৃ-মূর্তি ভাসিয়া উঠিল। ঐ মাতৃমূর্তির পার্শ্বেই তাহার মায়েরও শৃঙ্খলিত ভিখারিনি বেশ। তাঁদের দুইজনকেই চোখের কোণে দুই বিন্দু করিয়া করুণ অশ্রু। অভিমানী পুত্র অন্যদিকে মুখ ফিরাইয়া লইয়া কাঁদিয়া উঠিল—]

ও কে ? ও কে ছল আর ?

না—মা, মরা জনকে এ মিছে তরসানো আর !

আনোয়ার ! আনোয়ার ! !

[কাপুরুষ প্রহরীর ভীম প্রহরণ বিন্দ্র বন্দী তরুণ সেনানীর পৃষ্ঠের উপর পড়িল। অন্ধ কারা-গারের বন্ধ রক্তে রক্তে তাহারই আত্ম প্রতিধ্বনি গুমরিয়া ফিরিতে লাগিল—‘আঃ—আঃ—আঃ !’

আজ নিখিল বন্দী-গৃহে গৃহে ঐ মাতৃমুক্তিকামী তরুণেরই অতৃপ্ত কাঁদন ফরিয়াদ করিয়া ফিরিতেছে। যেদিন এ ত্রন্দন থামিবে, সেদিন সে-কোন অটিন্ দেশে থাকিয়া গভীর তৃপ্তির হাসি হাসিব জানি না ! তখন হয়তো হারা-মা-আমার আমায় ‘তারার পানে চেয়ে চেয়ে’ ডাকিবেন। আমিও হয়তো আব্বার আসিব। মা কি আমায় তখন নূতন নামে ডাকিবেন ? আমার প্রিয়জন কি আমায় নূতন বাহুর ডোরে বাঁধিবে ? আমার চোখ জলে ভরিয়া উঠিতেছে, আর কেন যেন মনে হইতেছে, ‘আসিবে সেদিন আসিবে !’]

তেগ—তলোয়ার। তরসানো—দুঃখ দেওয়া।

রণ-ভেরী

[গ্রীসের বিরুদ্ধে আকোরা-তুর্ক-গভর্ণমেন্ট যে যুদ্ধ চালাইতেছিলেন, সেই যুদ্ধে কামাল পাশার সাহায্যের জন্য ভারতবর্ষ হইতে দশ হাজার স্বেচ্ছা-সৈনিক প্রেরণের প্রস্তাব গুনিয়া লিখিত]

ওরে আয় !
 ঐ মহা-সিন্ধুর পার হতে ঘন রণ-ভেরী শোনা যায়—
 ওরে আয় !
 ঐ ইসলাম ডুবে যায় !
 যত শয়তান
 সারা ময়দান
 জুড়ি খুন তার পিয়ে হৃদ্যর দিয়ে জয়-গান শোন্ গায় !
 আজ শখ করে জুতি-টকরে
 তোড়ে শহীদের খুলি দুশ্মন পায় পায়—
 ওরে আয় !
 তোর জ্ঞান যায় যাক, পৌরুষ তোর মান যেন নাহি যায় !
 ধরে বনঝার ঝুটি দাপটিয়া শুধু মুসলিম-পঞ্জায় !
 তোর মান যায় প্রাণ যায়—
 তবে বাজাও বিষণ, ওড়াও নিশান ! বৃথা ভীকু সমঝায় !
 রণ— দুর্মদ রণ চায় !
 ওরে আয় !
 ঐ মহা-সিন্ধুর পার হতে ঘন রণ-ভেরী শোনা যায় !
 ওরে আয় !
 ঐ বননননন রণ-বনবান বনবনা শোনা যায় !
 শুনি এই বনবনা-ব্যঞ্জনা নেবে গঞ্জনা কে রে হয় ?
 ওরে আয় !
 তোর ভাই ম্লান চোখে চায়,
 মরি লজ্জায়,
 ওরে সব যায়,
 তবু কব্জায় তোর শম্শের নাহি কাঁপে আফসোসে হয় ?
 রণ— দুদ্দুভি শুনি খুন-খুবি
 নাহি নাচে কি রে তোর মরদের ওরে দিলিরের গোদায় ?

নজরুল-রচনাবলী

ওরে আয়
 মোরা দিলাবার খাঁড়া তলোয়ার হাতে আমাদেরি শোভা পায় !
 তারা খিঞ্জির যারা জিঞ্জির-গলে ভূমি চুমি মূবছায় !
 আরে দূর দূর ! যত কুকুর
 আসি শের-বব্বরে লাখি মারে ছি ছি ছাতি চড়ে ! হাতি
 ঘাল হবে ফের-ঘায় ?
 ঐ বননননন রণবনবন বনবনা শোনা যায় !
 ওরে আয় !
 বোলে দ্রিম্ দ্রিম্ তানা দ্রিম্ দ্রিম্ ঘন রণ-কাড়া-নাকাড়ায় !
 ঐ শের-নর হাঁকড়ায়—
 ওরে আয় !
 ছোড়্ মন-দুখ,
 হোক বন্দুক
 ঐ বন্দুক তোপ, সন্দুক তোর পড়ে থাক, স্পন্দুক বুক ঘায় !
 নাচ্ তাতা থৈ থৈ তাতা থৈ—
 থৈ তপ্তব, আজ পাণ্ডব সম খাপ্তব-দাহ চাই !

ওরে আয় !
 কর্ কোরবান আজ তোর জান দিল্ আল্লার নামে ভাই।
 ঐ দীন-দীন-রব আহব বিপুল বসুমতী ব্যোম ছায় !
 শেল- গর্জন
 করি তর্জন
 হাঁকে, বর্জন নয় অর্জন আজ, শির তোর চায় মাংস !
 সব গৌরব যায় যায় ;
 ওরে আয় !
 বোলে দ্রিম্ দ্রিম্ তানা দ্রিম্ দ্রিম্ ঘন রণ-কাড়া-নাকাড়ায় !
 ওরে আয় !
 ঐ কড়কড় বাজে রণ-বাজা, সাজ সাজ রণ-সজ্জায় !
 ওরে আয় !
 মুখ ঢাকিবি কি লজ্জায় ?

ছব্ ছব্বে ।
 কত দূর রে
 সেই পূব রে যথা খুন-খোশরোজ খেলে হররোজ দুশ্মন-খুনে ভাই !
 সেই বীর-দেশে চল বীর-বেশে,
 আজ মুক্ত দেশে রে মুক্তি দিতে রে বন্দীরা ঐ যায় !
 ওরে আয় !
 বল 'জয় সত্যম্ পুরুষোত্তম', ভীক যারা মার খায় !
 নারী আমাদেরি শুনি রণ-ভেরী হাসে খলখল হাত-তালি দিয়ে রণে ধায় !
 মোরা রণ চাই রণ চাই,
 তবে বাজহ দামামা, বাঁধহ আমামা, হাথিয়ার পাঞ্জায় !
 মোরা সত্য ন্যায়ের সৈনিক, খুন-গৈরিক বাস গায়।

ওরে আয় !
 ঐ কড়কড় বাজে রণ-বাজা, সাজ সাজ রণ-সজ্জায় !
 ওরে আয় !
 অব-রুদ্ধের দ্বারে যুদ্ধের হাঁক নকিব ফুকারি যায় !
 তোপ্ দ্রুম্ দ্রুম্ গান গায় !
 ওরে আয় !
 ঐ বননরণন খঞ্জর-ঘাত পঞ্জরে মূরছায় !
 হাঁকো হাইদার,
 নাই নাই ডর,
 ঐ ভাই তোর ঘুর-চবীর সম খুন খেয়ে ঘুব্ খায় !
 বুটা দৈত্যেরে
 নাশি সত্যেরে
 দিবি জয়-টীকা তোরা, ভয় নাই ওরে ভয় নাই হত্যায় !

ওরে আয় !
 মোরা খুন-জোশি বীর, কঙ্কুশি লেখা আমাদের খুনে নাই !
 দিয়ে সত্য ও ন্যায়ে বাদশাহি, মোরা জালিমের খুন খাই !
 মোরা দুর্মদ, ভরপুর মদ
 খাই ইশকের, ঘাত-শম্শের ফের নিই বুক নাঙ্গায় !
 লাল পল্টন মোরা সাচ্চা,
 মোরা সৈনিক, মোরা শহীদান বীর বাচ্চা,

খুন-খোশ-রোজ-রক্ত-মহোৎসব । হররোজ-প্রতিদিন । আমামা-শিরস্ত্রাণ । নকিব-তর্যবাদক ।
 হাইদার-মহাবীর হজরত আলীর হাঁক । খুন-জোশি-রক্ত-পাগলামি । কঙ্কুশি-কৃপণতা ।
 ইশকের-গেমের । শহীদান-Martyrs.

মরি জালিমের দাঙ্গায় !
 মোরা অসি বুকে বরি হাসি মুখে মরি জয় স্বাধীনতা গাই !
 ওরে আয়
 ঐ মহা-সিঙ্ঘুর পার হতে ঘন রণ-ভেরী শোনা যায় ! !

‘শাত-ইল-আরব’

শাতিল্ আরব ! শাতিল্ আরব ! ! পূত যুগে যুগে তোমার তীর ।
 শহীদের লোহ, দিলিরের খুন ঢেলেছে যেখানে আরব-বীর ।
 যুঝেছে এখানে তুর্ক-সেনানী,
 য়ুনানি, মিস্রি, আরবি, কেনানি —
 লুটেছে এখানে মুক্ত আজাদ্ বেদুঈন্দের চাঙ্গা শির !
 নাঙ্গা-শির—
 শম্শের হাতে, আঁসু-আঁখে হেথা মূর্তি দেখেছি বীর-নারীর !
 শাতিল্ আরব ! শাতিল্ আরব ! ! পূত যুগে যুগে তোমার তীর ।

‘কুত-আমারা’র রক্তে ভরিয়া
 দজ্জলা এনেছে লোহুর দরিয়া ;
 উগারি সে খুন তোমাতে দজ্জলা নাচে ভৈরব ‘মস্তানির’ ।
 ত্রস্তা-নীর
 গর্জে রক্ত-গঙ্গা ফোরাতে,—‘শাস্তি দিয়েছি গোস্তাখির !’
 দজ্জলা-ফোরাতে-বাহিনী শাতিল ! পূত যুগে যুগে তোমার তীর ।

বহায়ে তোমার লোহিত বন্যা
 ইরাক আজমে করেছ ধন্যা ;—
 বীর-প্রসূ দেশ হলো বরেণ্য মরিয়া মরণ মর্দমির !

শাতিল আরব—আরব দেশের এক নদীর নাম । দিলির—অসম সাহসী । য়ুনানি—য়ুনান দেশের অধিবাসী । মিস্রি—মিশরের অধিবাসী । কেনানি—কেনানের অধিবাসী । চাঙ্গা—টাটকা । কুত-আমারা—কুতল-আমার নামক স্থান, যেখানে জেনারেল টাউনসেন্ড বন্দী হন ।

মর্দ বীর

সাহারায় এরা ধুঁকে মরে তবু পরে না শিকল পদ্ধতির।

শাতিল্-আরব ! শাতিল্-আরব ! পূত যুগে যুগে তোমার তীর !

দুশ্মন্-লোহ্ ঈর্ষায়-নীল

তব তরঙ্গে করে ঝিলমিল,

বাঁকে বাঁকে রোষে মোচড় খেয়েছ পিয়ে নীল খুন পিণ্ডারির !

জিন্দা বীর

‘জুলফিকার’ আর ‘হায়দরি’ হাঁক হেঁধা আজো হজরত আলীর—

শাতিল্-আরব ! শাতিল্-আরব ! ! জিন্দা রেখেছে তোমার তীর।

লনাটে তোমার ভাস্বর ঢীকা

বস্রা-গুলের বহিতে লিখা,—

এ যে বসোরার খুন-খরাবি গো রক্ত-গোলাব-মঞ্জরীর !

খঞ্জরীর

খঞ্জরে ঝরে খজুঁর সম হেঁধা লাখে দেশ-ভক্ত-শির !

শাতিল্-আরব ! শাতিল্-আরব ! ! পূত যুগে তোমার তীর।

ইরাক-বাহিনী ! এ যে গো কাহিনী,—

কে জানিত কবে বঙ্গ-বাহিনী

তোমারও দুঃখে ‘জননী আমার !’ বলিয়া ফেলিবে তপ্ত নীর !

রক্ত-ক্ষীর—

পরাদীনা ! একই ব্যথায় ব্যথিত ঢালিল দু-ফোঁটা ভক্ত-বীর।

শহীদে দেশ ! বিদায় ! বিদায় ! ! এ অভাগা আজ নোয়ায় শির !

খেয়া-পারের তরণী

যাত্রীরা রাঙিরে হতে এল খেয়া পার,

বজ্জেরি তূর্থে এ গর্জেছে কে আবার ?

প্রলয়েরি আহ্বান ধ্বনিল কে বিষণ্ণে !
বনঝা ও ঘন দেয়া স্বনিল রে ঈশানে !

নাচে পাপ-সিদ্ধিতে-তুঙ্গ তরঙ্গ !
মৃত্যুর মহানিশা রুদ্ধ উলঙ্গ !
নিঃশেষে নিশাচর গ্রাসে মহাবিশ্বে,
ত্রাসে কাঁপে তরণীর পাপী যত নিঃশ্বে ।

তমসাবৃত্ত ঘোরা 'কিয়ামত' রাত্রি,
খেয়া-পারে আশা নাই ডুবিল রে যাত্রী !
দমকি দমকি দেয়া হাঁকে কাঁপে দামিনী,
শিঙ্গার হুকারে ধরধর যামিনী !

লজ্জি এ সিদ্ধুরে প্রলয়ের নৃত্যে
ওগো কার তরী ধায় নির্ভীক চিন্তে—
অবহেলি জলধির ভৈরব গর্জন
প্রলয়ের ডঙ্কার ওঙ্কার তর্জন !

পুণ্য-পথের এ যে যাত্রীরা নিষ্পাপ,
ধর্মেরি বর্ষে সু-রক্ষিত দিল্ সাফ !
নহে এরা শঙ্কিত বস্তু নিপাতেও
কাণ্ডারী আহ্মদ তরী ভরা পাথেয় ।

আবুবকর উসমান উমর আলি হায়দর
দাঁড়ি যে এ তরণীর, নাই ওরে নাই ডর !
কাণ্ডারী এ তরীর পাকা মাঝি মাল্লা,
দাঁড়ি-মুখে সারি-গান-লা-শরিক আল্লাহ !

'শাফায়ত'-পাল-বাঁধা তরণীর মাস্তুল,
'জাম্মাত' হতে ফেলে হুরি রাশ্ রাশ্ ফুল ।

শিরে নত স্নেহ-আঁখি মঙ্গল দাত্রী,
গাও জ্বারে সারি-গান ও-পারের যাত্রী।
বৃথা ত্রাসে প্রলয়ের সিঁধু ও দেয়া-ভার,
ঐ হলো পুণ্যের যাত্রীরা খেয়া পার।

কোরবানি

ওরে হত্যা নয় আজ 'সত্যাগ্রহ', শক্তির উদ্বোধন।
দুর্বল ! ভীক ! চুপ রহো, ওহো খাম্বা ক্ষুব্ধ মন !
ধ্বনি ওঠে রণি দূর বাণীর,—
আজিকার এ খুন কোরবানির !
দুস্বা-শির রুম-বাসীর
শহীদের শির-সেরা আজি।—রহমান কি রুদ্র নন ?
বাস ! চুপ খামোশ রোদন !
আজ শোর ওঠে জোর 'খুন দে, জ্ঞান দে, শির দে বৎস' শোন্ !
ওরে হত্যা নয় আজ 'সত্যাগ্রহ' শক্তির উদ্বোধন !

ওরে হত্যা নয় আজ 'সত্যাগ্রহ', শক্তির উদ্বোধন !
খঞ্জর মারো গর্দানেই,
পঞ্জরে আজি দরদ নেই,
মর্দানি'ই পর্দা নেই
ডর্তা নেই আজ খুন-খারাবিতে রক্ত-লুব্ধ মন !
খুনে খেলব খুন-মাতন !
দুনো উন্মাদনাতে সত্য মুক্তি আন্তে যুবব রণ।
ওরে হত্যা নয় আজ 'সত্যাগ্রহ' শক্তির উদ্বোধন !

ওরে হত্যা নয় আজ 'সত্যাগ্রহ' শক্তির উদ্বোধন !
চড়েছে খুন আজ খুনিয়ারার
মুসলিমে সারা দুনিয়াটার।

'জুল্ফকার' খুলবে তার
 দুধারী ধার শেরে-খোদার রক্তে-পূত-বদন !
 খুনে আজকে রুধব মন !
 ওরে . শক্তি-হস্তে মুক্তি, শক্তি রক্তে সুপ্ত শোন !
 ওরে হত্যা নয় আজ 'সত্যগ্রহ' শক্তির উদ্বোধন !

 ওরে হত্যা নয় আজ 'সত্যগ্রহ' শক্তির উদ্বোধন !
 আস্তানা সিধা রাস্তা নয়,
 'আজাদি' মেলে না পস্তানোয় !
 দস্তা নয় সে সস্তা নয় !
 হত্যা নয় কি মৃত্যুও ? তবে রক্ত-লুব্ধ কোন্
 কাঁদে—শক্তি-দুগ্ধ শোন—
 'এয় ইব্রাহিম আজ কোরবানি কর শ্রেষ্ঠ পুত্রধন !'
 ওরে হত্যা নয় আজ 'সত্যগ্রহ' শক্তির উদ্বোধন !

 ওরে হত্যা নয় আজ 'সত্যগ্রহ' শক্তির উদ্বোধন !
 এ তো নহে লোভ তরবারের
 ঘাতক জালিম জোরবারের !
 কোরবানের জোর-জানের
 খুন এ যে, এতে গোদা ঢের রে, এ ত্যাগে 'বুদ্ধ' মন !
 এতে মা রাখে পুত্র পণ !
 তাই জননী হাজেরা বেটারে পরাল বলির পূত বসন !
 ওরে হত্যা নয় আজ 'সত্যগ্রহ' শক্তির উদ্বোধন !

 ওরে হত্যা নয় আজ 'সত্যগ্রহ' শক্তির উদ্বোধন !
 এই দিনই 'মীনা'-ময়দানে
 পুত্র-স্নেহের গর্দানে
 ছুরি হেনে খুন ক্ষরিয়ে নে
 রেখেছে আব্বা ইব্রাহিম সে আপনা রুদ্র পণ !
 ছি ছি ! কেঁপো না ক্ষুদ্র মন !

জুল্ফকার—মহাবীর হজরত আলীর বিশ্বত্রাস তরবারি। শেরে—খোদা—খোদার সিংহ ; হজরত আলীকে এই গৌরবান্বিত নামে অভিহিত করা হয়। জোরবার—বলদপু। জোর-জান—মহাপ্রাণ। আজাদি—মুক্তি। আব্বা—বাবা। ইব্রাহিম—Abraham. হাজেরা—হজরত ইব্রাহীমের স্ত্রী।

- আজ জল্লাদ নয়, প্রহ্লাদ নয় মোল্লা খুন-বদন !
ওরে হত্যা নয় আজ 'সত্যাগ্রহ' শক্তির উদ্বোধন !
- ওরে হত্যা নয় আজ 'সত্যাগ্রহ' শক্তির উদ্বোধন !
দ্যাখ্ কেঁপেছে 'আরশ' আস্মানে,
মন-খুনী কি রে রাশ মানে ?
ত্রাস প্রাণে ?—তবে রাস্তা নে !
প্রলয়-বিমাণ কিয়ামতে তবে বাজাবে কোন্ বোধন ?
সেকি সৃষ্টি-সংশোধন ?
- ওরে তাখিয়া তাখিয়া নাচে ভৈরব বাজে ডম্বর শোন্ !—
ওরে হত্যা নয় আজ 'সত্যাগ্রহ' শক্তির উদ্বোধন !
- ওরে হত্যা নয় আজ 'সত্যাগ্রহ' শক্তির উদ্বোধন ।
মুসলিম-রণ-ডঙ্কা সে,
খুন দেখে করে শঙ্কা কে ?
টঙ্কারে অসি ঝঙ্কারে
- ওরে হুঙ্কারে, ভাঙি গড়া ভীম কারা লড়ব রণ-মরণ !
ঢালে বাজবে বন্-বান্ !
- ওরে সত্য মুক্তি স্বাধীনতা দেবে এই সে খুন-মোচন !
ওরে হত্যা নয় আজ 'সত্যাগ্রহ' শক্তির উদ্বোধন !
- ওরে হত্যা নয় আজ 'সত্যাগ্রহ' শক্তির উদ্বোধন !
জোর চাই আর যাচনা নয়
কোরবানি-দিন আজ না ওই ?
বাজনা কই ? সাজনা কই ?
কাজ না আজিকে জান্ মাল দিয়ে মুক্তির উদ্ধরণ ?
বল্—'যুব জাণ্ ভি পণ !'
ঐ খুনের খুঁটিতে কল্যাণ-কেতু, লক্ষ্য ঐ তোরণ !
আজ আল্লার নামে জান কোরবানে ঈদের পূত বোধন !
ওরে হত্যা নয় আজ 'সত্যাগ্রহ' শক্তির উদ্বোধন !

মোহররম

নীল সিয়া আসমান, লালে লাল দুনিয়া,—
 ‘আম্মা ! লাল তেরি খুন কিয়া খুনিয়া’।
 কাঁদে কোন্ ক্রন্দসী কারবালা ফোরাতে,
 সে কাঁদনে আসু আনে সীমারেরও ছোরাতে !
 রুদ্র মাতম্ ওঠে দুনিয়া দামেশকে—
 ‘জয়নাতে পরাল এ খুনিয়ারা বেশ কে ?’
 ‘হায় হায় হোসেনা’ ওঠে রোল বনঝায়,
 তলওয়ার কেঁপে ওঠে এজিদেরো পঞ্জায় !
 উন্মাদ ‘দুলদুল’ ছুটে ফেরে মদিনায়,
 আলি-জাদা হোসেনের দেখা হেথা যদি পায় !
 মা ফাতেমা আস্মানে কাঁদে খুলি কেশপাশ,
 বেটাদের লাশ নিয়ে বধূদের শ্বেতবাস !
 রণে যায় কাসিম ঐ দুঘড়ির নওশা,
 মেহেদির রঙটুকু মুছে গেল সহসা !
 ‘হায় হায়’ কাঁদে বায় পূরবী ও দখিনা—
 ‘কঙ্কণ পঁইচি খুলে ফেলো সকিনা !’
 কাঁদে কে রে কোলে করে কাসিমের কাটা-শির ?
 খানখান খুন হয়ে ক্ষরে বুক-ফাটা নীর !
 কেঁদে গেছে থামি হেথা মৃত্যু ও রুদ্র,
 বিশ্বের ব্যথা যেন বালিকা এ ক্ষুদ্র !
 গড়াগড়ি দিয়ে কাঁদে কচি মেয়ে ফাতিমা,
 ‘আম্মা গো পানি দাও ফেটে গেল ছাতি মা !’
 নিয়ে তৃষা সাহ্যরার, দুনিয়ার হাহাকার,
 কারবালা-প্রান্তরে কাঁদে বাছা আহা কার !
 দুই হাত কাটা তবু শের-নর আববাস
 পানি আনে মুখে, হাঁকে দুশ্মনও ‘সাববাস’ !
 দ্রিম্ দ্রিম্ বাজে ঘন দুন্দুভি দামামা,
 হাঁকে বীর ‘শির দেগা, নেহি দেগা আমামা !’
 মার থনে দুধ নাই, বাচ্চারা তড়পায় !
 জিভ চুষে কচি জ্ঞান থাকে কিরে ধড়্টায় ?
 দাউদাউ জ্বলে শিরে কারবালা-ভাস্কর,
 কাঁদে বানু—‘পানি দাও, মরে জাদু আসগর !’

কলিজা কাবাব সম ভুনে মরু-রোদ্দুর,
 ঝাঁ ঝাঁ করে কারবালা, নাই পানি খজুর,
 পেল না তো পানি শিশু পিয়ে গেল কাঁচা খুন,
 ডাকে মাতা,—পানি দেবো ফিরে আয় বাছা শুন !
 পুত্রহীনার আর বিধবার কাঁদনে
 ছিড়ে আনে মর্মের বত্রিশ বাঁধনে !
 তাম্বুতে শয্যায় কাঁদে একা জয়নাল,
 ‘দাদা ! তেরি ঘর কিয়া বরবাদ পয়মাল !’
 হাইদরি-হাঁক হাঁকি দুলদুল-আসওয়ার
 শম্শের চম্কায়ে দুশমনে ত্রাসবার !
 খসে পড়ে হাত হতে শত্রুর তরবার,
 ভাসে চোখে কিয়ামতে আল্লার দরবার ।
 নিঃশেষ দুশমন ; ওকে রণ-শ্রান্ত
 ফোরাতে নীরে নেমে মুছে আঁখি-প্রান্ত ?
 কোথা বাবা আসগর ? শোকে বুক-ঝাঁঝরা
 পানি দেখে হোসেনের ফেটে যায় পাঞ্জরা !
 ধুঁকে ম’লো আহা তবু পানি এক কাৎরা
 দেয়নি রে বাছাদের মুখে কমজাতরা !
 অঞ্জলি হতে পানি পড়ে গেল ঝর-ঝর
 নুটে ভূমে মহাবাহু খঞ্জর-জজ্বর !
 হলকুমে হানে তেগ ও কে বসে ছাতিতে ?—
 আফতাব ছেয়ে নিল আঁধিয়ারা রাতিতে !
 আসমান ভরে গেল গোধূলিতে দুপরে,
 লাল নীল খুন ঝরে কুফরের উপরে !
 বেটাদের লোহ-রাঙা পিরাহন-হাতে, আহ—
 ‘আরশের পায় ধরে কাঁদে মাতা ফাতেমা,
 ‘এয় খোদা বদলাতে বেটাদের রক্তের
 মার্জনা করো গোনা পাপী কমবখতের !’

বানু—আসগরের মাতা। আসগর—ইমাম হোসেনের শিশুপুত্র। জয়নাল—ইমাম হোসেনের পুত্র।
 বরবাদ—নষ্ট। পয়মাল—ধ্বংস। দুলদুল—আসওয়ার—‘দুলদুল’ ঘোড়ার সওয়ার ইমাম হোসেন।
 এক কাৎরা—এক বিন্দু। কমজাতরা—নীচমনাগণ। হলকুম—কষ্ট। তেগ—তরবারি। আফতাব—
 সূর্য। কমবখত—হতভাগ্য।